

Ysgol Gymraeg Newydd i Ddinbych-y-pysgod

Bydd Dinbych-y-pysgod - calon 'Lloegr Fach' yn draddodiadol - yn gweld agor ei hysgol gynradd Gymraeg gyntaf y flwyddyn nesaf.

Bydd yr ysgol Gymraeg newydd, sy'n gallu darparu ar gyfer hyd at 210 o ddisgyblion rhwng 3 ac 11, yn agor yn y dref yn ne Sir Benfro ym mis Medi 2016.

Mae corff llywodraethol dros dro yn bodoli eisoes a bydd yn hysbysebu am bennaeth newydd i'r ysgol y mis yma.

"Mae hwn yn gyfle cyffrous a hanesyddol iawn i addysg gynradd yn y dref," meddai'r Cynghorydd Huw George, yr Aelod Cabinet dros y Gymraeg.

"Bydd yn cryfhau a datblygu darpariaeth gynradd a chyfrwng Cymraeg yn y cylch ac, ynghyd â'r ysgol Saesneg newydd, bydd yn rhoi'r dechrau addysgol gorau oll mewn bywyd i blant y cylch."

Canlyniad i alw cynyddol am addysg Gymraeg yn y dref Saesneg draddodiadol yw'r ysgol Gymraeg newydd.

Eisoes mae 71 o ddisgyblion yn uned Gymraeg bresennol Ysgol Fabanod y dref tra bo 39 yn yr Ysgol Iau.

A, thra daw'r rhan fwyaf o ddisgyblion yr ysgol newydd o'r unedau Cymraeg presennol hyn, bydd hefyd yn derbyn disgyblion o ddalgylch ehangach ar draws de'r sir.

Dywedodd Julie Jones, Cadeirydd y Corff Llywodraethol Dros Dro, y bu gweddnewidiad yn yr agwedd tuag at y Gymraeg yn Ninbych-y-pysgod dros yr ychydig ddegawdau diwethaf.

"Rhyw 37 mlynedd yn ôl, un o'n llywodraethwyr newydd - Ann Griffiths - oedd y gyntaf yn y cylch i ymgyrchu dros uned Gymraeg yn yr Ysgol Fabanod bresennol, a sefydlwyd maes o law gyda llond dwrn o blant. Erbyn hyn mae hi ar gorff llywodraethu dros dro ysgol Gymraeg newydd sbon fydd yn agor ei hadwyau ym mis Medi 2016 gyda thros 110 o blant ar y gofrestr," meddai.

"Lle'r oedd llond dwrn o rieni unwaith yn aros i godi eu plant o'r unedau Cymraeg ar ddiwedd y diwrnod ysgol, rydym erbyn hyn mewn tri ffigwr, yn aros ger pump o wahanol ystafelloedd dosbarth ar draws yr ysgolion Babanod a Chynradd.

"Mae'r gwahaniaeth yn sylweddol, ac mae'r Cyngor Sir wedi derbyn y galw am ddewis i allu addysgu plant yn llawn yn y Gymraeg.

"Y cyfan sydd arnom ei angen nawr yw penodi Pennaeth newydd rhagorol gyda'r brwdfrydedd a mynd i ateb yr her gyffrous hon - gymaint yw'r galw lleol, dim ond un ffordd fydd y niferoedd yn yr Ysgol Gymraeg newydd, a hynny yw ar i fyny. Dim Lloegr Fach bellach."

Mae'r ysgol newydd yn rhan o fuddsoddiad £8.37 miliwn mewn addysg gynradd yn Ninbych-y-pysgod gan Gyngor Sir Penfro.

Yn ogystal â'r ysgol Gymraeg newydd, bydd ysgol gynradd Saesneg WR newydd, yn darparu ar gyfer 390 o ddisgyblion o 3 i 11, yn cael ei sefydlu hefyd.

Bydd cost y prosiect £8.37 miliwn yn cael ei rannu rhwng y Cyngor Sir a rhaglen Ysgolion yr 21ain Ganrif Llywodraeth Cymru.